



KOMUNIKADO PA PRENSA

Fecha
22 di desèmber 2015

Kontakto
Kabinèt Minister VVRP

PETISHON DI AVA AIR NENGÁ PA FALTA DI KUMPLIMENTU KU LEI

Willemstad – Minister di Tráfiko, Transporte i Planifikashon Urbano (VVRP), sra. Suzy Camelia-Römer no por honra e petishon di AVA Curacao B.V., esta AVA Air, pa haña pèrmit ekonómiko pa lanta un kompania di aviashon pa ehekutá buelonan regular of iregular, pa motibu ku e petishonnan no ta kumpli ku reglanan manera stipulá den e lei i dekretonan di aviashon di nos pais.

Manera ta konosí, 28 di Aprel 2015, Minister di VVRP interino, dr. José Jardím, a manda un karta pa AVA Air i pidi esaki pa entregá e informashonnan finansiero ('proof of funds') ku lei ta rekerí den un termino di dies (10) dia. Dia 3 di yüni 2015 Minister di VVRP, sra. Camelia-Römer a alargá e periodo ku un (1) luna mas di tempu, pa AVA Air entregá nan informashonnan finansiero rekerí pa lei.

Dia 11 di yüni 2015, AVA Air a entregá algun dokumento na Minister di VVRP. Basá riba konseho di Banko Sentral riba e dokumentonan aki, kombiná ku konseho di SOAB riba e suma di plaka rekerí, a pidi AVA air riba 8 di sèptèmber 2015 pa entregá un karta irevokabel di kredito. Dia 23 di sèptèmber 2015 Minister di VVRP a risibí un karta di abogado di AVA air, kompañá ku un karta di un kantor situá na Merka. A pidi Banko Sentral pa validá e supuesto prueba aki di e rekursionan finansiero ('proof of funds') ku lei ta eksigí. Banko Sentral a informá Minister di VVRP ku no por a validá e fondonan basá riba e dokumento presentá pasó e dokumento no ta kumpli ku e kriterianan stipulá.

Konsiderando e dokumentonan suministrá den e kaso aki, Minister Camelia-Römer adishonalmente a enkargá un investigashon forénsiko pa asina verifiká outensidat ("echtheid") di e dokumentonan. E investigashon forénsiko a mostra ku tin duda rondó di e dokumentonan entregá i ku un (1) sigur no ta outéntiko.

Na final ta bon pa eksplisitá ku Minister di VVRP den transkurso di tempu a hasi tres (3) denuncia na Ministerio Públiko relashoná ku e kaso aki. E promé denuncia ta basá riba un supuesto e-mail ku nòmber di Minister di un índole sugestivo/kuestionabel dirigí na un di e direktornan di Insel Air ku ningun ora so Minister no a skibi, e di dos denuncia ta basá riba e echo ku e representantenan di AVA Air a akusá e direktor di Outoridat di Aviashon di a kometé (intento di) korupshon, i por último a hasi un di tres denuncia pa e echo ku a entregá un dokumento ku e intenshon pa yega na pèrmit ekonómiko di kual ekspertonan forénsiko a determiná ku no ta trata di un dokumento outéntiko. Ministerio Públiko lo hasi e investigashonnan nesenario segun nos leinan penal.